

成安縣志

卷十五  
六

成安縣志卷十五

故事

天地之所以遞嬗陵谷之所以變遷國家之所以廢興存亡世道人心風俗習慣之所以移易而流轉莫不有其原因有其結果而撮而叙之皆成故事且具有勸善懲惡陶鑄社會之微權則信乎閒坐說玄宗者亦當世之有心人也成邑之故事卽成邑之大事記也卽成邑民族精神之所以改良而演進不可挪移之一種歷史也故凡筆之前史載在邑乘散見於經史子集說部雜錄之文流傳於輿人父老樵牧婦孺之口皆前言往行佚事舊聞足以與都人士浮沉而升降者豈可等閒視之哉謹

成安縣志

卷十五 故事

一

天津文竹齋印

遵魯史編年之例次第列人後之人有所考鑑而擇取焉庶不至數典而忘其祖也志故事

史事

史事一門謹遵 省政府第二次訓令將古今大事用編年法逐條補錄惟歷朝改革係大事中之尤要者似應詳細着筆以明眞象然又恐與沿革一門完全重複故祇擇其中大事與本縣微有關係者畧爲敘述至其因革之詳情與興廢之理由則概從缺

唐帝堯七十五年使大禹治水至於衡漳

尚書參舊縣志  
衡漳故道在縣城東漳河集等

村即大禹治水所至處

八十七年肇十有二州邑屬冀

尙書參舊縣志

虞帝舜三十三年大禹受命于神宗正天下水土仍爲九州邑

屬冀

通鑑參經世曆

夏大禹四年收九牧之金鑄九鼎象九州仍屬冀

郊祀志參通鑑

商王河亶甲元年遷都於相

即今河南安陽縣

邑屬畿輔地

通鑑參舊縣志

按河亶甲在位九年國號曰商並非殷嗣後又傳六王國號

仍未改至盤庚遷殷方改爲殷舊縣志河亶甲上誤加殷字

今據通鑑更正

周敬王六年

魯昭公二十有八年

春魯昭公如晉次於乾侯

春秋

九年

魯昭公三十有一年

春王正月公在乾侯季孫隱如會晉荀躒于適歷

時晉侯使荀躒責季氏不納昭公爲

### 成安縣志

卷十五 故事

二

天津文竹齋印

此會也季氏負捶謝過欲納昭公昭公創惡季氏不敢入春秋

解云春秋之義待君命然後卒大夫明其非君命者不錄之也今昭公不在所以書季孫隱如會晉荀躒於適歷春秋

按他人誅亂臣誅之於其既春秋誅亂臣誅之於其將將猶必誅則有其迹者無所逃罪可知矣舉凡會盟之私乞假之專師旅之擅類無不概與誅夷以暴其不臣之罪而更進於此者豈顧問哉昭公雖無人君之度季氏逐之亦難免罪大惡極之名惟其時篡逆之徒接迹于天下而君臣大義猶未盡泯今觀晉侯責季氏季氏負捶謝過專權恣肆之跋扈將軍仍不敢終無忌憚者則春秋之名分爲之也

十年春正月昭公在乾侯取闞十有二月公薨於乾侯

春秋

二十有六年

哀公元年

夏四月齊侯衛侯救邯鄲圍五鹿秋齊侯衛

侯會於乾侯救范氏也

左轉

二十九年晉攻邯鄲拔之邑入晉

通鑑參舊縣志

貞定王十一年晉荀瑤與趙氏韓氏魏氏滅范中行氏而分其

地邑仍屬晉

通鑑

威烈王二十三年初命趙籍為諸侯邑入趙

舊縣志

安王十六年趙都邯鄲邑為輔

顯王十八年趙侯魏侯同盟于漳水上

秦始皇十九年秦大將王翦滅趙邑入秦

二十六年分中原為三十六郡邑屬邯鄲郡

俱同上

### 成安縣志

卷十五 故事

三

天津文竹齋印

二世元年陳餘

大梁人號成安君

與張耳共事趙王武臣李良已定常山

還報趙王趙王復使良畧太原至石邑秦兵塞井陘未能前李

良得秦書反趙追殺王姊襲邯鄲竟殺武臣趙人多為耳餘耳

目者故得脫出收兵得數萬人客有說耳餘曰兩君羈旅而欲

附趙難可獨立立趙後輔以誼可就功乃求得趙歇立為趙王

居信都李良進兵擊餘餘敗良良走歸章邯

撮錄前漢書本傳

按餘先事武臣後事趙歇皆能盡心竭力不避艱險其心可

謂正其品可謂純矣號成安君血食茲土誰曰不宜雖武臣

不得其死餘對之似有愧色然事起倉猝餘亦幾不能免非

餘有意負武臣也如過事吹求責其不能死節迂矣

三年項羽九戰章邯大破秦軍後章邯軍棘原項羽軍漳南相持未戰陳餘成安君遺章邯書曰白起爲秦將南征鄢郢北阬馬服攻城略地不可勝計而竟賜死蒙恬爲秦將北逐戎人開榆中地數千里竟斬陽周何者功多秦不能盡封因以法誅之今將軍爲秦將三歲矣所亡失以十萬數而諸侯并起滋益多彼趙高素諛日久今事急亦恐二世誅之故欲以法誅將軍以塞責使人更代將軍以脫其禍夫將軍居外久多內郤有功亦誅無功亦誅且天之亡秦無愚智皆知之今將軍內不能直諫外爲亡國將孤特獨立而欲常存豈不哀哉將軍何不還兵與諸侯爲從約共攻秦分王其地南面稱孤此孰與身伏鈇質妻子

## 成安縣志

卷十五 故事

四

天津文竹齋印

爲僂乎邯得書狐疑未幾背秦歸楚而秦從此遂一蹶不振矣

史記項羽本紀

漢王二年齊田榮并王三齊榮與彭越將軍印令反梁地陳餘陰使張同夏說說榮曰項羽爲天下宰不平今盡王故王於醜地而王其羣臣諸將善地逐其故主趙王乃北居代餘以爲不可聞大王起兵且不聽不義願大王資餘兵請以擊常山以復趙王請以國爲扞蔽齊王許之因遣兵之趙陳餘悉發三縣兵與齊并力擊常山王大破之張耳走歸漢陳餘迎故趙王歇於代反之趙趙王因立陳餘爲代王

史記項羽本紀

漢王至灞上秦王子嬰

奉璽符節以降秦亡

通鑑

三年漢大將韓信領軍擊趙擒趙王歇成安君被斬於泚水上

通鑑參

舊縣志

西漢初唐厲官舍人高祖起豐厲從之以左司馬入漢以亞將

攻籍却敵為東部都尉破籍侯成武為漢中尉擊布為斥邱懿

侯千戶高祖六年八月封

漢書功臣表

孺子嬰初始元年王莽自稱新

皇帝廢孺子為定安公邑入新

通鑑

漢更始元年秋九月申屠建奉命自武關入長安眾共誅莽邑

復歸漢

撮錄通鑑

東漢世祖建武元年光武即位洛陽邑入東漢

通鑑

東漢初戴憑

字次仲小戴聖曾孫祖籍斥邱時僑寓汝南平輿

光武朝拜侍中數進見問得失

### 成安縣志

卷十五 故事

五

天津文竹齋印

帝謂憑曰侍中當匡補國政勿有隱情憑對曰陛下嚴帝曰朕何用嚴憑曰伏見前太尉西曹掾蔣遵清亮忠孝學通古今陛下納膚受之訴遂致禁錮世以是為嚴帝怒曰汝南子欲復黨乎憑出自繫廷尉有詔勅出後復引見憑謝曰臣無謬諤之節而有狂瞽之言不能以尸伏諫偷生苟活誠慙聖朝帝即勅尚書解遵禁錮拜憑虎賁中郎將以侍中兼領之

後漢書餘見人物門

按信任賢臣明良交泰此盛世之休風人臣之至願也設不幸君雖明有時而蔽賢臣禍且不測當此生死關頭即國家安危所係如能毅然決然扶持善類面折廷爭此又人臣之極則也然使君不遇光武則殆矣語曰君明則臣直誠哉是

言

安帝二年遣使賑貸冀州流民邑被貸舊縣志

獻帝初平四年袁紹軍薄落津魏郡兵反與黑山賊于毒等共

覆鄴城紹因還屯斥邱資治通鑑

紹與公孫瓚和引軍南旋三月上已大會賓徒於薄落津聞魏郡兵反與黑山賊于毒等數萬人共覆鄴城殺郡守坐中客家在鄴者皆憂怖失色紹容貌自若賊有陶升者獨將部衆踰西城入具車重載紹家屬及諸衣冠在州內者身自捍衛送至斥邱紹還因屯斥邱以陶升為建義中郎將 同上

獻帝建安二十五年曹丕稱皇帝廢帝為山陽公邑入魏通鑑

季漢昭烈帝章武元年昭烈名備繼統於西川邑仍屬魏通鑑

二年秋七月大蝗饑舊縣志

魏元帝咸熙二年司馬炎稱皇帝廢魏主為陳留王邑入晉通鑑

### 成安縣志

卷十五 故事

六

天津文竹齋印

晉愍帝建興元年夏四月漢石虎陷鄴邑為所據舊縣志

石勒時雹起西河介山大如雞子平地三尺洿下文餘歷趙郡

廣平鉅鹿郡千餘里樹木摧折禾稼蕩然文獻通考兼府志

東晉明帝太寧三年夏五月司州降趙邑入趙舊縣志

成帝咸康三年燕慕容皝嗣位黃泓魏郡斥邱人由參軍遷左常侍領

史官甚重之石季龍攻皝將走遼東泓曰賊有敗氣不過二

日必當奔潰宜嚴勒士馬為追擊之備皝曰今寇盛如此卿言

必走孤未敢信泓曰殿下言盛者人事耳臣言必走者天時也

胡足為疑及期季龍果退皝益奇之後以老歸家歎曰燕必中

在興其吳人恨吾年過不見耳卒後三年吳王慕容垂興焉晉書

列傳餘見  
人物門

按強弱無定形而有定理形不足憑執形以言強弱者偽也  
理有可信據理以斷強弱者真也然理非數端所能盡勢非  
觀人於微遲回審顧獨具隻眼不為功若浚之料石季龍吳  
王垂其深得此義也夫

穆帝永和六年春閏正月趙石閔弒其主鑒自立改國號曰魏  
年號永興邑入魏通鑑

八年夏四月燕慕容恪等擊魏執其主閔以歸殺之邑入燕通鑑

帝奕太和五年冬十一月秦王堅入鄴執燕主暉暉降燕亡邑

入秦通鑑

### 成安縣志

卷十五 故事

七

天津文竹齋印

武帝太元十一年河北數郡復歸燕邑入燕舊縣志

安帝隆安二年冬十二月魏王拓拔珪破燕稱皇帝改元天興

邑入北魏通鑑參縣志

北魏永熙三年夏六月魏高歡舉兵反秋七月魏主修奔長安

依宇文泰歡入洛陽推清河王亶承制決事冬十月歡立清河

世子善見於洛陽年號天平魏分爲二國十一月東魏遷都於

鄴邑屬之爲畿輔地通鑑參縣志

東魏孝靜帝興和三年大稔舊縣志

八年夏五月齊王高洋稱皇帝廢其主善見爲中山王東魏亡

邑入北齊通鑑參縣志



北齊天保三年遣慕容儼

清都成安人見北齊書列傳

鎮郢城始入便為梁大都

督侯瑱任約率水陸軍奄至城下儼隨方禦備瑱等不能剋又於上流塞船路人信阻絕城守孤懸衆情危懼儼導以忠義率步騎出城奪擊大破之蕭循又率衆五萬與瑱約合軍攻擊儼與將士力戰終夕約等乃退追斬墳驍將張白石夏五月瑱約等又相與并力悉衆攻圍城中食少糧運阻絕無以為計儼死守六閱月詔還

北齊書列傳詳見人物門

按兵精將勇地大物博有形之強也恩信交孚死生不渝無形之強也曠觀歷史有形之強恒不敵無形魏武八十萬大軍敗于赤壁符堅百萬雄兵敗於淝水往事有徵比比皆是

### 成安縣志

卷十五 故事

八

天津文竹齋印

今觀儼以孤軍守危城累破大敵此理益彰彰明矣

北齊幼主恒承光元年周主率師入鄴追緯及恒獲之遂滅齊

邑入後周

通鑑

周太祖引為親信之達奚長儒

以平蜀平齊功先封成安侯後進爵為公

字富仁代人也

少懷節操膽烈過人攻城野戰所當必破而韜畧尤有特長與烏丸軌圍陳將吳明徹於呂梁陳遣驍將劉景率勁勇七千來為聲援軌令長儒逆拒之長儒取車輪數百繫以大石沉之清水連轂相次以待景軍景軍至舩艦礙輪不得進長儒乃縱奇兵水陸俱發大破之俘數千人及獲吳明徹以功進位大將軍

撮錄隋書本傳

後周末年于宣道字元明性謹密不交非類仕周釋褐左侍上士以父功賜爵成安縣男邑二百戶隋高祖踐阼遷內史舍人進爵爲子

節錄隋書本傳

後周大象初李穆

隴西成紀人

自上柱國轉並州總管加邑至九千戶

拜大左輔總管如故隋高祖作相尉迴之作亂也遣使招穆穆鎖其使上其書穆子士榮以穆所居天下精兵處陰勸穆反穆深拒之乃奉十三環金帶於高祖蓋天子之服也穆尋以天命有在密表勸進高祖既受禪下詔曰公既舊德且又父黨敬惠來旨義無有違便以今月十三日恭膺天命俄而穆來朝高祖降坐禮之拜太師贊拜不名眞食成安縣三千戶

隋書本傳

### 成安縣志

卷十五 故事

九

天津文竹齋印

後周大象時楊素

字處道弘農華陰人

仕周前從齊王憲與齊人戰於河陰

以功封清河縣子邑五百戶其後每戰有功及齊平加上開府改封成安縣公邑千五百戶

隋書本傳

後周大象時賜爵成安縣男之李德林

字公輔博陵安平人

幼有節操學富

才優王基締構叶贊謀猷文誥之美時無與二隋文受禪之後進爵成安子

節錄隋書本傳

大象三年

即周主贊十三年

春二月隋王楊堅稱皇帝年號開皇周亡邑

入隋

通鑑

隋代王侑義寧二年唐王李淵稱皇帝年號武德邑入唐

通鑑

按通鑑李淵立代王侑爲皇帝年號義寧淵自爲大丞相封

唐王次年淵稱皇帝廢代王侑又按通鑑隋恭帝名侗年號皇泰舊縣志作恭帝侑義寧二年未免錯誤今據通鑑更正

唐太宗貞觀元年分天下為十道邑屬河北道舊縣志

太宗封秦王後領軍攻武牢拔之引戴胄字玄肩大戴德仲孫祖籍斥邱僑寓相州安陽新唐書宰相世

系表云戴氏出自子姓宋戴公之孫以祖父諡為氏傳至德世居魏郡斥邱為府士曹參軍封武昌縣男大理少

卿缺太宗曰大理人命所繫胄清直其人哉即日命胄長孫無忌被召不解佩刀入東上閣尚書右僕射封德彝論監門校尉不覺罪當死無忌贖胄曰校尉與無忌罪均臣子於尊極不稱誤法著御湯劑飲食舟舩雖誤皆死陛下錄無忌功原之可也若罰無忌殺校尉不可謂刑帝曰法為天下公朕安可阿親戚

### 成安縣志

卷十五 故事 十 天津文竹齋印

詔復議德彝固執帝將可胄曰不然校尉緣無忌以致罪法當輕若皆誤不得獨死繇是與校尉皆免其犯顏敢諫法意至析秋豪類如此帝益重之遷尚書左丞矜其貧特詔賜錢十萬新唐

書列傳詳見人物門

按職官犯法與庶民同罪本無軒輊於其間然議親議貴古有專條除大逆不赦外其餘均可仰邀寬典無忌親貴兼全有大勳勞於國一時失愼金作贖刑未嘗不可特校尉本身無罪緣無忌以致罪更當薄罰了事奈何無忌免死竟欲加校尉以極刑哉德彝阿附取容劣迹昭著無足深責玄肩侃侃直陳面折廷爭斷不使殺一不辜洵不愧名賢之後矣

貞觀四年大有年

舊縣志

高宗乾封中戴至德

戴胄兄子胄無子以至德為後

累遷西臺侍郎同東西臺三品

又遷尚書右僕射人有所訴至德詰究本末理直者密為奏終

不顯私恩或以問至德答曰慶賞刑罰人主之柄為臣豈得與

人主爭也帝知歎美之

新唐書列傳餘見人物門

唐睿宗景雲間李愷

并州汶水人

舉明經高第授成安尉時張說罷宰

相為相州刺史坐有善相者說徧問官屬後執當貴工指愷及

臨河尉鄭巖說以女妻巖而歸其甥陰於愷愷擢至禮部尚書

盡節後贈司徒太尉諡曰忠懿巖仕終少府監

唐書本傳

玄宗開元二十一年冬十月分天下為十五道置採訪使邑仍

### 成安縣志

卷十五 故事

十一

天津文竹齋印

屬河北道

舊縣志

代宗大歷六年大旱斗米千錢

舊縣志

憲宗元和七年大熟斗米錢五十文

舊縣志

昭宗大順三年六月李克用帥蕃漢諸軍營於斥邱遣其男落

落將三千騎薄洹水營葛從周與戰大破之擒落落

舊五代史

光化三年秋七月大風拔木發屋

舊縣志

昭宣帝天祐三年三月梁王全忠

更名

稱皇帝廢帝為濟陰王

邑屬後梁

通鑑

梁主龍德二年

晉稱天祐十九年

正月梁將戴思遠拔成安

舊五代史

思遠引兵趣魏州李思源先之遣兵挑戰思遠知有備乃西拔成安大掠而還

通鑑輯覽

後梁主瑱龍德三年晉王李存勳入大梁梁主瑱自殺國亡邑

屬後唐為畿輔地

通鑑

後唐莊宗同光二年立邑劉叟女為后

新五代史唐家人傳

唐主從珂清泰三年契丹立石敬瑭為晉皇帝敬瑭割幽薊等

十六州以賂之後唐亡邑入後晉

通鑑

後晉高祖天福十一年契丹主德光大舉入寇執晉主重貴以

歸後晉亡十二年二月劉知遠稱帝於晉陽邑入後漢

通鑑

後漢隱帝乾祐三年郭威篡立後漢亡邑入後周

通鑑

後周廣順初藥元福領陳州防禦使保奏王明

字如晦  
成安人

署判官會

劉崇寇晉州命元福將兵援之事多咨於明先是州縣吏送丁

### 成安縣志

卷十五 故事

十一

天津文竹齋印

壯糧餉一夕夫盡遁去元福怒明入白元福曰今軍儲無闕丁夫數萬人文吏懦不能制斬之何益不如寬以待之賊敗凱旋公無專殺之名不亦善乎元福感悟盡免其死宋端拱元年由并州刺史改禮部侍郎會契丹擾邊詔以明知正定府契丹遁去其先聲奪人有如此

節錄宋史列傳  
餘見人物門

按岳忠武云仁信智勇嚴缺一不可信智勇三字為行軍之必要人盡知之無待煩言至仁嚴二字愚人往往疑其相反謂仁則失之寬嚴於何有嚴則鄰於殘仁於何有豈知仁得乎中即是嚴嚴得乎中即是仁仁與嚴不相悖適相成也然此完全為約束兵將言之若夫護送糧餉之丁夫則更宜從

寬况當賊敗凱旋之日軍儲無闕念此無知小民雖逃亡一空然並未貽誤軍機更何可殘民以逞王明深知此義洵功德無量之偉人也

世宗顯德三年秋八月大水 舊縣志

恭帝元年春正月周殿前都檢點趙匡胤稱皇帝國號宋廢周主宗訓為鄭王邑入宋 通鑑

宋太祖建隆元年春正月遣使賑貸諸州邑被賑漳河決注城下水深二丈 舊縣志

太宗興國初寇準 字平仲陝西華州下邳人 由進士出知成安縣其心一以愛人為主小民皆深感之每期會賦役不惟不忍敲朴亦未嘗輒

### 成安縣志

卷十五 故事

十三

天津文竹齋印

出符移百姓已踴躍輸將爭先獻納蓋仁德感人之深也民立仰功祠與明桂文襄公 名萼任成安縣令 並祀 舊府志參縣志

真宗咸平四年夏六月詔賜九經於學冬十二月饑蠲賦減役發廩賑之 舊縣志

景德二年春正月賑饑夏四月葺城池

祥符二年夏四月旱疫賜藥併方

天德二年春正月賑

三年秋八月遣使撫恤水災

五年冬十月大稔

仁宗慶曆三年冬十二月雨赤雪 以上俱舊縣志

英宗朝王廣淵

字才叔  
成安人

以進士為大理法直官擢寶文閣待制知

慶州宣撫使興師入夏境檄慶會兵方授甲卒長吳達以眾亂廣淵亟召五營兵禦之達率二千人斬關出廣淵遣部將姚兕材廣追擊降其眾亂遂定

宋史列傳餘詳人物門

宋治平中王臨

成安人廣淵弟  
進士字大觀

知順安軍改河北沿邊安撫都監時

契丹兩輸人為義軍來歸者數萬或請遣還臨曰彼歸而我遣之必為亂不如因而撫之詔從其言來者益眾契丹悔失計由是臨進安撫副使

宋史列傳餘見人物門

按古語云非我族類其心必異誠以戎狄具貪悍之性情入繁盛之中華候隙乘便輒為橫逆此必然之勢也馬援領隴

### 成安縣志

卷十五 故事

十四

天津文竹齋印

西太守征討叛羌徙其餘種於關中居馮翊河東空地迨永初叛亂未免夷夏俱傷曹操徙武都氏於秦川以禦蜀軍當時未嘗不收其效然西晉末亦大受其敝蓋一時權宜之計非萬世久遠之謀有識者宜早絕其原也今臨恐義軍為亂建議撫之而不出妙計以遣還其識見與馬伏波魏武帝將毋同

英宗治平三年三月慧見於昴如太白長丈有五尺次日孛於

畢

舊縣志

神宗熙寧二年改洹水縣為鎮入成安境內

舊縣志

三年春正月詔散青苗錢冬十二月立保甲法行免役法

通鑑

四年春二月置學官詔增漳河役兵三月詔給學田增學官員  
舊縣志

七年秋七月蝗  
舊縣志

哲宗紹聖元年冬十二月漳河決  
舊縣志

徽宗政和六年春二月詔增廣學舍  
舊縣志

高宗建炎二年冬十二月金人寇大名府陷之劉豫叛降金邑

屬金  
通鑑參縣志

四年九月金立劉豫為齊帝年號阜昌邑屬豫  
通鑑

金世宗大定十七年鑄泮水洪鐘  
舊縣志

章宗明昌六年六月漳河隄決詔速塞之  
舊縣志

### 成安縣志

卷十五 故事

十五

天津文竹齋印

衛生至寧元年元兵拔洺州邑入元  
舊縣志

宋理宗淳祐十一年春二月太白犯昴  
舊縣志

寶祐元年夏五月熒惑歲星合在昴

三年夏五月太陰入畢冬十月有流星出自畢後又入

元太宗八年置邢洺路總管府以邢磁威三州隸之邑屬磁州  
以上俱舊縣志

元世祖中統四年秋八月旱免今歲田租十之六  
元史本紀

至元元年夏四月近漳處引水灌田頗有獲水利者五月太陰

犯昴後屢犯大旱  
舊縣志

三年大蝗



十五年改洛磁路爲廣平路總管府邑屬之

二十年春二月太白犯昴後屢犯

武宗至大二年夏四月大蝗秋八月又大蝗

泰定帝泰定二年春二月辰星在畢

以上俱舊縣志

致和元年夏五月大雨雹

元史本紀

順帝至正二年廣平磁威州饑賑鈔共五萬錠邑被賑

元史本紀

七年夏四月盜起遣兵捕之

舊縣志

二十八年明太祖遣徐達等下廣平諸路邑屬明

通鑑參  
縣志

明洪武初史鑑擢都御史因宦寺謀干朝政疏請防微杜漸上

嘉納之事詳人物門

### 成安縣志

卷十五 故事

十六

天津文竹齋印

十一年戊午夏五月旱詔夏稅秋糧盡行蠲免

府志採  
縣志

十八年乙丑夏四月大水

全上

建文帝朝郭亮

合肥人以功  
封成安侯

爲永平衛千戶燕靖難兵至永平與

指揮趙彞以城降卽命爲守且旁郡邑旣克山後諸州皆下成

祖因無後顧憂遂南敗耿炳文於真定旣而遼東鎮將江陰侯

吳高都督楊文等圍永平亮拒守甚固援師至內外合擊高退

走未幾高中讒罷楊文代將復率衆來攻亮及劉江合擊大敗

之累進都督僉事成祖卽位以守城功封成安侯祿千二百石

世伯爵二十一年三月卒贈興國公諡忠壯

撮錄明  
史列傳

英宗正統元年丙辰夏五月蝗

府志採  
縣志

十四年己巳詔旌孝子張憲門

縣志

天順八年甲申夏五月大風雹飄瓦拔木

府志採  
縣志

憲宗成化八年壬辰建東西吏曹立邑要紀女為妃

縣志

二十年甲寅大旱

縣志

孝宗弘治二年己酉夏六月大水

府志採  
縣志

八年舉人李岳謁選時不私干謁

事詳人  
物門

十五年壬戌秋九月地震有聲

縣志

武宗正德二年丁卯冬十二月大雪壅戶塞衢行者不通

府志採  
縣志

六年夏四月流賊劉六劉七齊彥名等掠廣平攻成安邯鄲雞

澤縣境

康熙  
志

### 成安縣志

卷十五 故事

十七

天津文竹齋印

八年夏相傳黑眚逼人老幼皆鳴金禦之

府志鷄澤邯  
鄲志皆同

九年進士張潤身擢御史巨璫貪弁貴戚近臣多被彈劾事詳

人物門

十五年庚辰四月雨雹大如雞卵

府縣  
志

世宗嘉靖元年壬午知縣桂萼來任

以明經知長葛縣蔡紹先在邑多善政

詳人  
物門

二年四月旱隕霜殺麥

府志採  
縣志

五年丙戌春三月大饑盡數發倉

縣志

七年戊子夏五月大旱

府志採  
縣志

九月庚寅夏四月大饑

全上

十三年甲午詔建坊旌表孝子侯聰

十五年丙申冬十月地震府志採縣志

十六年丁酉靈雨成災全上

十七年戊戌夏四月命戶部發米賑饑全上

二十年辛丑飛蝗蔽天食禾殆盡大饑發內帑金來賑改建成安君祠於圓照寺東

二十一年知縣杜聰來任 築外堤 建郭門 建北漳堡全

上

侯服任卽墨丞不畏權貴事詳人物門

三十一年進士安謙知吳縣事調停賦役人稱便全上

### 成安縣志

卷十五 故事

十八

天津文竹齋印

三十二年春大饑冬十一月大水詔發太倉賑饑府志兼縣志

三十四年乙卯夏五月地一日三震如雷全上

三十五年夏五月地震如雷一日三次全上

進士李齊芳不阿附嚴嵩全上

進士李齊芳奄人傳旨除官齊芳劾之全上

三十六年丁巳修儒學以孝子陶盤入祠鄉賢全上

三十八年進士蔡可教授南陽推官不枉法全上

三十九年庚申旱大蝗詔賑饑全上

四十一年壬戌春正月地震全上

進士蔡可賢任岢嵐道時俺答因互市數要盟會可賢單騎會

諸紅門 全上

進士吳善言督餉上谷積羨金數萬悉注册存庫 全上

四十二年癸亥地震漳水衝潰城東門 全上

穆宗隆慶二年進士袁魁知陽曲縣聽斷若老吏 全上

三年己巳六月大水 全上

四年庚午春正月地震 全上

神宗萬曆四年丙子大水 全上

十年壬午大疫人病腫項併瘟死者甚衆 全上

十四年丙戌春三月大風麥槁 全上

十五年丁亥大旱黑風晝晦民多疫餓殍載道 全上

### 成安縣志

卷十五 故事

十九

天津文竹齋印

十六年戊子大熟瘟死者衆 修成安君祠 全上

二十年壬辰夏秋大水漳水決入本縣故道 府志兼縣志

二十一年癸巳大水 縣志

二十五年丁酉夏四月大雹壞屋 府縣志

二十六年戊戌夏大旱柳生烟 全上

進士王家瑞知咸陽縣不畏權燄 全上

二十八年庚子漳水決王林隄 全上

三十年壬寅漳水決竇公隄 全上

三十一年癸卯夏五月漳河決修護城隄 全上

三十三年乙巳春三月雹深尺許漳河決 全上

三十五年丁未秋八月飛蝗蔽日 全上

三十九年辛亥秋七月大水 全上

四十一年癸丑夏六月漳河決大水圍城縣令百方捍禦得不

入村民衝溺甚衆連送陽寺被害尤毒 縣志

四十二年甲寅春二月賑饑 府縣

四十四年丙辰春正月賑饑施粥夏旱秋七月刻邑乘 全上

廩生王懷德居喪哀毀過甚孫奇逢遺之詩 全上

以歲貢爲胙城訓導喬宮以身作賭士風丕變 全上

熹宗天啟辛酉舉人白奏議十歲父卒能以言慰母心 全上

漳河集人廩生王順命幼孤事母極孝 全上

### 成安縣志

卷十五 故事

二十

天津文竹齋印

向陽村人安桂香有焚借券事 全上

進士陳廷謨奉命督蜀應變有方 全上

三年癸亥夏六月漳水大溢決城南堤 全上

愍帝崇禎四年秋七月流寇掠縣南境鄉民死者四十餘人烈

婦常氏罵賊死 縣志

七年甲戌秋烈風迅雷雨雹大如碗屋瓦皆碎人禽死者甚多

府縣志

癸酉舉人史煒授江南潁上知縣寬於待民嚴於御史 全上

十一年戊寅流寇出沒西山設立親丁十六營防禦 縣志

十二年己卯修磚城高三丈有奇 全上

十三年庚辰歲大侵盜起鄉村搶掠無虛日民入城寺觀皆滿  
紳士皆守城全上

十四年辛巳土寇焚掠東關東南鄉屠戮頗甚大疫大旱大饑

秋漳水入城毀學宮縣志採府志

十五年壬午逃兵突至城幾陷塚夫劉景槐擊退焚掠關廂村

落縣志

二月李自成數十萬衆來攻陳州知州侯君擢字際明成安舉人與兵備

僉事關永傑日夜爲倣備率士民分堞守禦賊遣使說降斬其  
頭懸之城上力竭城破罵不絕口死贈右參議蔭一子入監讀

書節錄明史列傳  
詳見人物門

## 成安縣志

卷十五 故事

二十一

天津文竹齋印

按古語云士窮見節義世亂識忠臣忠臣誠國家之至寶也  
然非養氣於平日必不能盡節於崇朝平居讀書談道見古  
大臣鞠躬盡瘁慷慨捐軀始而悲繼而慕終且代爲欣幸謂  
天下之至慘實天下之至榮也養成至大至剛之氣一遇生  
死關頭眞所謂含笑入地矣聞際明未通籍時德性極堅操  
持極正其殆養之有素已塞于天地之間而始有此全節也  
夫

西馬村常天祐邑庠生以不肯從賊自縊死全上

艾束人常仕充正定營書從征流賊陣亡全上

貢生王一統官趙州訓導清兵破趙州一統死節全上

十七年甲申李自成僭號順僭元永昌知縣郭維垣來任改縣名爲漳安

清世祖入都順天改元順治郭維垣逃知縣鄭一元來任舊縣志

二年乙酉地久荒免元年租稅縣志

三年丙戌丈量地蝗蝻食禾幾盡縣志

九年壬辰肥鄉漳水漲壞田舍徙流成安城下縣志

十一年甲午六月漳水入城公署民房損壞殆盡免本年租稅縣志

十五年戊戌重修霧觀寺唐塔

康熙元年壬寅八月淫雨五晝夜大水淹麥縣志

### 成安縣志

卷十五 故事

二十二

天津文竹齋印

六年丁未唐塔成

七年戊申六月地震河水溢秋漳水再入城房壞人多死縣志

丙午舉人傅廷宣有夏施茶冬施粥事事詳人物門

以善講五經名世武濯邑侯馬晃慕其高致贈以經學鴻儒匾

額全上

河瞳庠生程元英扶弱抑強排難解紛全上

貢生靳方升治喪依文公家禮三年不入內全上

十年辛亥春雨雹大如拳大旱秋大水知縣王公楷多方杜禦

蠲俸犒賞城乃全全上

鄉民張名世還金舉鄉耆免田租十分之三全上

縣志  
十一年壬子奉撫院文各村修牆鑿壕防盜修東城樓修縣志

二十六年丁卯詔豁去河流沙壓民地一百八十餘頃屯田十

二頃

續縣志

二十九年庚午停止五貢殿試

五十五年丙申詔編審新丁永不加賦

縣志

雍正二年甲辰詔民丁屯丁銀攤入地糧徵收

全上

四年丙午起科河流地較尋常地銀數減輕因丁銀已經派定

例不攤徵

全上

十一年癸丑起科沙壓地例不攤徵丁銀

全上

### 成安縣志

卷十五 故事

二十三

天津文竹齋印

邑庠生王京與其繼母前子地三十畝莊一所

全上

增廣生侯芬好濟貧

全上

國子監學生王聰事母曲盡孝道

全上

太學生董晟李家瞳人嘗自立義學聘名師教鄰邑六縣青年

全上

乾隆元年丙辰恩賞老民老婦

六年拔貢朱世瑞工書善吟落筆數千言立就所著見著述門

太學生孔學洙有拾金不昧事

全上

高陵阜人太學生楊六藝有孔北海風

全上

諸生侯文炳英烈孝義當時監生吳雲龍武生潘從乾諸生周



訓等咸以孝友稱 全上

由生員入太學例授州同知陳爾達以世閥而嘗布衣疏食 全上

漳河集人牛體仁五歲失怙六七歲即知讀書庚寅恩科舉於

鄉 全上

北漳堡人趙廷儀廩生喜讀書七歲喪父聞書聲即訴於母馮

氏而求學焉 全上

鄉義村人潘興邦以燒瓦缸為生極孝 全上

張家莊人吳美父好酒極困時美典身上衣沽酒以進 全上

諸生徐有典日夜侍母值新婚仍不入已室 全上

### 成安縣志

卷十五 故事

二十四

天津文竹齋印

向陽人蔡四達肯將遺產讓半於出嗣之兄 全上

十六年辛未詔年老應試生均賞舉人 恩賞老民及老婦

三十一年丙戌詔會試年老舉人賞給職銜恩賞老民老婦

縣志

舊

三十七年詔五年一次編審之例永行停止

三十五年庚寅詔免直屬錢糧

四十三年丁酉詔免直屬錢糧 詔會試舉人分別年歲賞給

職銜 恩賞老民老婦

皆同上

四十九年甲辰詔賞賚八十以上老民並七八十以上老婦物

價銀兩

舊縣志

五十五年庚戌詔按年分府輪免直屬錢糧 詔清刑五十七

年壬子詔輪免錢糧

### 成安縣志

卷十五 故事

二十五

天津文竹齋印

六十年乙卯詔按年分府輪免直屬錢糧

嘉慶元年丙辰詔賞賚八九十以上老民物價銀兩

三年戊午陳可久恩賜舉人詔清理庶獄

四年己未陳可久恩賜翰林院檢討

皆全上

六年辛酉西彭留村民人侯金貴溫用光五代同堂經縣詳請

恩賜舉人

舊縣志

七年壬戌溫用光恩賜國子監學正

舊縣志

十七年壬申秋禾旱傷

採訪

十八年歲稔北郎堡黃大士施穀濟貧

全上

道光元年夏秋大疫

採訪

三年四月西鄉雨雹

採訪

十年閏四月二十二日地震裂縫有長二三十丈者湧出黃黑沙多寡不等漳河水涸官署民居傾圮大半斃人畜甚多發帑

賑濟災民

採訪兼府志

十月黃大士設粥局於本村仰給者日以

千人自冬徂春全活甚衆大順廣道李公德立慕其名造廬請謁既見嘆曰人言果不虛予以旌匾曰惠孚珂里太守蕭公光浩亦旌以匾曰好義可風大士受而藏之不榜於門恐近名也

十一年春夏旱冬大雪井凍樹裂

府志

十六年大旱夏無麥秋無禾

採訪冊

十八年大旱民饑餓死者道相望

全上

### 成安縣志

卷十五 故事

二十六

天津文竹齋印

二十五年大旱民饑

全上

二十七年大稔黃大士按戶助糧

全上

咸豐六年六月飛蝗蔽天秋收均減大半

全上

七年七月飛蝗徧野大饑發粟賑恤

全上

十一年七月山東匪程順書及其妹五姑娘統衆西竄初四日擾曲周知縣余承恩督勇擊敗之初五日掠肥鄉知縣楊毓栢夜劫其營賊驚遁初六日賊至舊店遇官兵大戰敗之五姑娘

竄成安

兵勇合力擊之北遁程五姐素以跑馬賣藝爲業 府志

同治元年十二月教匪張錫珠竄擾曲周永年肥鄉等縣余承恩追賊至肥鄉西韓村接戰敗之賊東竄遇天台山防勇不敢

接戰南奔成安縣境二十三日肥鄉令楊毓柟與余承恩合兵  
追剿於成安承恩在成安西關與賊接仗破之賊北走楊毓柟  
截殺於西韓村賊聞之潛遁入邯鄲蘇曹村二十五日入城劫  
獄焚掠殺戮團長死之

府志

二年宋逆景詩自八月十八日竄擾成安後被余承恩追擊又  
竄至肥鄉邯鄲永年雞澤鉅鹿等處東渡運河僧王嚴飭祝道  
台塏恒提督蘇都統急追賊復南竄九月初五日掠成安漳河  
店栢寺營大堤西等村復由天台山康家堡新安鎮向東北去

府志

七年春正月捻匪北竄渡漳覆溺賊騎無數擾及縣境

採訪

## 成安縣志

卷十五 故事

二十七

天津文竹齋印

八年秋大旱民饑賑恤蠲緩秋征

採訪兼府志

光緒三年大旱米價昂貴設局平糶

採訪府兼志

十五年六月朔大風寒如冬令秋大水

採訪

十八年三月十二日大風晝晦二十三日又風霾

採訪

二十六年夏大旱無麥

採訪

民國九年大旱夏無麥秋無禾至八月下旬方得透雨種麥甚

多 採訪

故事

軼聞

書曰謀及庶人詩曰詢于芻蕘古太史輶軒采錄揚子雲鉛槧提携凡街談巷議里諺衢歌無不在旁搜博採中也至說部之流傳野老之稱譽言雖近而指則遠詞雖淺而意則深誦言如不忘味片詞隻字皆有可取之價值帝如大舜猶好邇言之察聖如孔子不忘孺子之歌豈非軼聞不可忽之明驗哉

成安縣志

卷十五

故事

二十八

天津文竹齋印

清康熙八年江南潁州人王公楷

字木重

由進士來牧茲土絕無

自私自利之心微論苞苴不行繭絲不事即舊規常例亦一切報罷正賦止求足歲額雜徭止求充公用大工大役止求竣乃事斷未有絲毫浮派於額數之外者履任以來覩文廟傾圮不堪心焉傷之因歲比不登民力告匱踟蹰三年重其事不忍言十一年秋雖獲小稔民力仍恐未足公首先捐俸倡率僚友於是經費充足大工乃獲告成本邑循吏前清無出其右者以丁內艱歸民至今思慕不置云

採訪冊參藝文志

嘉慶十八年歲大稔餓死者日有所聞北郎堡黃大士

字懋修同知銜

富

而好禮仗義輕財覩其顛連困苦不禁惻然傷之於是開倉出

### 成安縣志

卷十五 故事

二十九

天津文竹齋印

穀按人分給賴以舉火者數百家道光十一年地震甚烈房屋傾圮大半貧民嗷嗷待哺者到處皆同公觸目傷心慨然歎曰是予責也爰稟明邑候趙公諱廷椿設粥局於本村仰給者日以千計自冬徂春所費不貲而餓者完全有賴矣道府兩憲均送匾額以旌之子孫稟承遺教英才濟濟三科拔貢皆出其門人以爲積善之報云

採訪

道光二十九年己酉科拔貢黃鶴舉字羽卿西鄉北郎堡人懋修第三子也以孝友舉優行聲名藉甚雖屢試棘圍不售絕不以得失介意嘗寓京師與四方知名士立文社輒第一爲長白錫公鶴亭河間包公含章錫山侯公葉唐江右萬公藕舫所鑑

賞雖往來於名公鉅卿之門詩文外不以仕進干以是名知都下乃以二親年老邑養無人棄舉子業南旋上奉高堂兼教子

姪云

採訪冊

同治七年河南鹿邑進士王德炳號子範自永年調任茲土公仁慈嚴正人莫敢干以私喜培養人才與多士講解文藝及羣書娓娓不倦儼如父兄訓子弟爲地方興利除弊恒晝夜思索竭盡心力以故事無不成去任時餞送盈野邑人感戴不忘數

十年如一日

採訪冊

北郎堡修堡城二月經始八月告竣

按成安四境皆平原曠野非有崇山峻嶺長河巨川之阻故

## 成安縣志

卷十五

故事

三十

天津文竹齋印

盜賊之來往往任其馳騁奔竄末由制彼之死命同治壬戌癸亥間山左逆匪蹂躪十數村邑人聚衆禦賊死者不下千餘人廬舍灰燼財物一空蓋慘不可言狀矣鄉人苦心焦慮默然深念若不急設法以圖存死亡之禍恐卽在目前於是甲子乙丑東北兩區卽有修堡城者西區仍寂寂無聞迨戊辰南匪又入畿內村人乃不約而同咸願急築堡城爲守望之計七閱月而工告成由是邑之西鄙屹然隆起居者有恃無恐攻者聞風不前豈非一方之保障歟是役也董其事者恩貢生黃金策

字芙夢

從九品趙炳鄉耆楊元吉也

採訪

五年修城上三門樓煥然一新十一月知縣請獎在事出力人

員

六年北漳堡築寨

七年正月初二日有北漳堡陶孝子盤之後裔名成捻匪南來  
扎營北漳堡入夜一匪令成出汲恐成逃匿尾追之成至井旁  
乘其不備將匪擠落井中急走他方得免於難採訪冊

宋金五亦北漳堡人身長七尺力最強口袋容粟十斗兩掖挾  
兩袋而趨人皆稱為宋大力捻匪至本邑城南有邊馬一人獨  
竄高家莊後金五持長槍猝與相遇匪舉洋槍擊射金五急躲  
隨用長槍挑匪落馬馬逸槍為金五所得即時入城

八年秋大旱民饑賑恤蠲緩秋征採訪兼府志黃大士賑饑出錢貳百

### 成安縣志

卷十五 故事

三十一

天津文竹齋印

餘萬

光緒三年大旱民饑米價昂貴斗米京錢二千設局平糶

四年三月二十八日大風白晝如夜

十五年六月朔大風寒如冬令秋大水採訪

十八年三月十二日大風晝晦二十三日又風霾採訪

二十六年夏大旱無麥清皇后皇上宮妃均走陝西採訪

二十七年停武科

廣宗武舉景廷賓因奉令賠償教民損失鄉民抗違共迫之進  
署見縣令縣令拒不納東召村文生劉永清等邀集鄉團合操  
揚言進城鬧衙縣令以亂聞當道扎飭大名鎮大順廣道帶兵



鎮撫鄉民益危懼團結遂於二十四日與官兵接戰後直督袁世凱聞警令統領段祺瑞及倪嗣冲吳鳳嶺馬龍標馬金敘張廷獻等率師咸集至是攻破件只村名廣宗縣屬亂黨死亡頗衆民亦多有殘傷景劉俱逸後獲之成安解至威縣正法

二十八九年鄉會兩試就闡汴省此係庚子讐教聯軍入都後雙方議和所訂條約之一

二十八年壬寅並補行庚子辛丑科改試策論義場中舊制稍有變更但糊名不易書是科張永和劉金策中式劉灝中副車二十九年某村七歲小兒被匪抱去後贖回此係成邑架票之始三十年甲辰會試後科舉全停

## 成安縣志

卷十五 故事

三十二

天津文竹齋印

溯自明太祖一統天下以甲科

進士

乙科

舉人

明經

貢生

取士三途

並重捨是士無進身之階清仍其舊履行四十餘年五貢均應殿試其獲雋者並以知州知縣經歷及六科給事中任用至康熙二十九年五貢殿試停止

民國初年張公琴書

字樂天歲貢生西南鄉前裴里人

因事赴永邑偶出遊遇一人

象貌溫良惟瘦弱至極儼如鬚桑之餓人公生有至性樂善好施不覺惻然傷之詳細詢問知爲丁姓世業農遂慨然助大洋數元以周其急丁拜問姓名叩謝而去不數日丁欲賣女於公託人說項公初不忍迨屢請不已出以至誠既堅不能辭祇得出大洋六十元購爲使女入門後公又另有深意蓋是時公哲

嗣香遠膝下尙無寧馨若此女果賢位占小星無疑乃甫逾一年其父母携洋來贖以常情論之安有允許之理公惻隱存心大度包涵非惟準贖且不名一錢從此骨肉團圓謀生亦綽有餘裕渠父母感激涕零屢來叩謝公扶危濟困仗義疎財他事類如此

採訪

民國五年某村六十老嫗被匪劫去經久贖回

六年六月初十日大雨如注風更猛烈異常大樹多爲拔起低田皆被淹

某村中年婦人被匪劫去後爲軍人剿匪救出

九年大旱夏無麥秋無禾至八月下旬方得透雨種麥甚多

## 成安縣志

卷十五 故事

三十三

天津文竹齋印

某村少女被匪劫去族人尾追開槍誤中已女殞命十月十日華洋義賑會發來麥種一百石十畝以下之戶每戶准領二升十月十九日縣立平糶局開辦每日售米以百石爲限每戶糶糧不得過五升

十二月十六日晚近八點地震約十分鐘始停

十年三月二十三日省長曹銳巡視到成假寓王筆岑宅次日赴大越日復返老弱婦孺遮道呼救臨去留賑洋仟元

四月二十八日放賑糧票一張可得紅糧八十斤錢票一張僅得銅子五十枚

五月二十二日動工修大邯汽路聞係義賑會欸交美教士督

修用意以工代賑

某村某姓家長被匪劫去鄉人持械追之匪懼爲衆所奪猝撕票

十一年一月成立財政所

某村浮屠之尸被匪割去其首主人以價贖之既交欸匪埋首於野竟忘其處以他首與之費財若干仍得假首

十四年某村已葬之尸亦被匪盜其首經戚族公議謂此事萬不可價贖主人涕泣從之後此風漸息

十五年十一月褚督辦赴大由成經過爲搭一歡迎棚聞費洋八百餘元

### 成安縣志

卷十五 故事

三十四

天津文竹齋印

某村某姓老嫗爲匪夜間劫去經久贖回

爲戰事特捐六次公債等費每頃地約出三十元之譜市面頓形緊張

十六年某村某姓匪入其家本擬抱去小兒主人叩首哀求與匪相奪槍斃主人仍將小兒抱去

一月二十二日張少帥午前赴大下車數語卽去午後自大返邯未下車卽西行

三月十九日會民入城

十七年五月二日革命軍到城北軍去人心稍定縣長王作霖隨軍北去新縣長張爾共來任縣公署改爲縣政府警察所改

稱公安局

本年元旦後大兵雲集約二三師衆一切供應可稽者約十餘萬元至初五日兵去

七月國民政府定都南京北京改稱北平直隸改稱河北省自春徂夏迄未落雨至六月雨未降而蝗蝻生匪人亦乖機而起初六日被匪佔踞楊村宋村兩村殺人放火距城三十里煙燄可見初八日落雨四寸晚秋有望七月初五雨雹成災被打未死之晚苗至八月十二日又十嚴霜統計一年中兵匪旱蝗雹霜無一不備數十年凶歉當以本年爲最

此段係按舊歷記載

庚子以後此方氣候忽變雨量減少實甚平均計算前此遇旱

成安縣志

卷十五 故事

三十五

天津文竹齋印

十年中僅一二近時遇旱十年中竟六七十八年一月四日河北省初次舉行縣長考試共四場末場係口試結果共取一百十三人耿采章及格入選

次開公安局長考試場規同共取一百一十六人

又開佐治人員考試場規同共取一百一十人王懷璧及格入選

又開經徵人員考試場規同共取六十七人王翰元及格入選以上所取各員同入訓政學院肄習六月另行榜示按次委任此次應試各省人皆許入場末後及格入選者外省與本省幾各得其半

十九年聚衆打赤鬚龍俗云打旱梢樁因官廳禁止未成事實按此係多年惡習時逢久旱無賴之徒造言某村富翁家供有赤鬚龍天甫作雲龍輒仰首吹空使雲四散打毀乃雨於是寫說帖數百章散布四遠各村擇定某月某日至某村打赤鬚龍其目的惟在搶掠特以打赤鬚龍爲名有守土之責者遇有此事發生急宜禁止

二十年四月石友三部下某旅長突至成安南鄙徐村將寨中所有槍枝盡行摘去又綁去某姓二人一以三百元贖回其一人因大軍進寨閉門不納所以銜之刺骨乃架至臨漳城內非有一萬五千元決不釋放後又移至磁縣六月終被綁者知事

## 成安縣志

卷十五 故事

三十六

天津文竹齋印

無結果乃典賣田園並託人揭債共出大洋八千餘元始得回籍然而財產已無幾矣

二十年九月山東省開縣長考試王先舟入場及格膺選

共取四十名內

有九名係他省考取及格縣長均行免試

### 補遺

#### 劉勝先之亂

劉勝先山東莘縣人清光緒廿六年傭耕於邑之南散胡時山東拳匪以讎教起慈禧太后與莊端兩親王爲所惑直藩覺羅廷雍黨以助亂羽書飭下縣查抄教堂獎勵拳民日數至邑令孫天錦猶疑不能決勝先揚言於衆曰吾幼習拳棒山東某老

師某大師兄皆吾同門友屢接來函命吾在此起兵抄滅洋教聞此間二洋人皆富而無禮仗洋人勢力欺壓平民民恨之入骨今焚燒教堂收沒二洋人資產報讎洩恨以圖富貴千載一時也衆爲之動適林里堡張建與其村天主教教民有隙迎勝先於家大聚黨徒名大刀會號鐵布衫言入其會者能刀槍不入槍炮不過也不數日聚至四五十人遂焚毀艾束教堂搶掠教民之稍有資財者四五家會徒大橫六月朔勝先衣新制魯山綢單衫仍著傭耕時白布單褲乘無鞍耕馬率持刀者十餘人至縣署謁令令不見轉謁邑汎王得安王不敢置問祇詭隨其詞令去己而後勝先乘馬橫行街市徒衆汹涌或踵其後或

## 成安縣志

卷十五 故事

三十七

天津文竹齋印

導其前識者知禍將不測人人危懼越日邑令宣示省文查抄西街教堂縱民撤毀已著手邑紳等知事不合密言於令將教堂房屋加封暫沒入官撥兵駐守教堂幸無恙然門牕已破損不完矣十七日邑庠生韓璫與張建同村素亦有隙建言於勝先勝先亦以韓左袒教民卽將韓擄至建家反縛其手痛加辱詈一日擁韓至村外僞斬者三然終不敢加害次日九鐘聲言送縣治罪入自西門勝先除衣綢衫外又換新制魯山綢單褲惟耕鞋尙未換易乘馬率衆三十餘人驅韓至縣有持土槍者導韓前行數武一放以示威至十字街西勝先下馬入某商家飲酒命建乘馬送韓至縣面交縣令俄至縣署令聞之久久不

出班役將韓接至班房暫行看管時觀者塞衙人心大憤建與其衆皆面如土色有從堂內出者曰大老教網勿令逃跑衆附和之聲如雷動會徒皆持刀嘿嘿躍出四散逃匿建不得脫遂被捉押勝先在商家飲方酣聞信急持刀槍出時男女觀者街爲之滿勝先恐人攔阻卽在門內扣放因不演放法屢扣不響乃擲手槍脫綢衫提刀一躍而出逢人便劈范兒莊高小集以手迎刀被劈落無名指及小指二個血淋漓至縣署報冤有張林者亦與張建同村而有隙乘勢從後樓勝先腰勝先轉刃向後連劈劈傷林背肉二片約長三寸許林忍痛緊抱之不撒手擁至十字街團局門前中樓寺李占林適至勝先劈之不中占

## 成安縣志

卷十五 故事

三十八

天津文竹齋印

林急取團局標槍從勝先右脅衝入至左脅透出胸爲之洞勝先不能支始擲刀伏於地占林欲槍環刺力猛槍杆出槍頭陷勝先脅內勝先尙匍匐西行意欲逃死婦孺磚石隨步交加約行二十餘步腦漿迸裂而斃報至官官猶以要打打死爲言復報已死令心始安乃命地保舁出郊外掩埋一面押建治罪一面出示寬免協從使得改過復業亂遂平

### 景廷賓之竄擾

景廷賓者廣宗縣武舉也清光緒二十八年以抗包洋款聯合村團與官兵決裂戰敗於五月秒竄入邑之北漳堡時大旱民心不安革生霍天慶爲之散傳單約期舉事六月初六並遣其

黨從縣城東南一帶搶劫而入沿村索錢掠畜日將午至栢寺營邑令張琨聞報率縣隊及軍役等迎擊至金山與賊相隔二里許天大雨賊聞散逸令遣兵役追緝獲陳邦元遂廉得廷賓在境內潛匿狀乃急電督憲袁發兵來縣會同拿捕無何統領馬龍標道員倪嗣冲先後率兵約二千至廷賓已遠逸無蹤兵圍北漳堡搜查不得遂密購眼線四出嚴訪旋縣役自連送村捉獲廷賓子及霍天慶審知廷賓逃處是夕大雨傾盆終宵不息龍標率兵乘夜冒雨出發至臨漳縣屬之郭小屯緝獲廷賓次早八鐘凱旋回成沿途泥深尺許廷賓被縛俯首馬尾行泥淖中見者驚訝時六月十五日也遂由倪道審正堂供解至威

## 成安縣志

卷十五 故事

三十九

天津文竹齋印

縣肇事處凌遲處死併將其頭與手足炸焦盛以木籠游行下縣用示鎮懾雖曰警戒人心然法亦太酷也而廷賓竄擾吾邑之案遂結

### 會民之起

民國九年大旱饑饉邑令林蓬春侵沒賑款不以民命爲急民死者十之三逃者十之三爲匪者十之三始有抬肉墩請財神之案即擄人勒贖案次年流亡未復獨沙河村窪地棉花收較豐蓬春卽指爲瑞棉言有一萼兩花之異從京津購來女優數人大演堂戲藉口爲瑞棉慶戲資在邑屬各村加額攤派民重因爲盜益多擄人掠贖之案月必十數起至數十起民以匪患不能安度因一



向例民有搶劫案件令必親驗必遣警團追躡數里或十數里  
回報曰賊遠逸乃已徐出拘票標明嚴緝字樣派差勒限拘捕  
藉平事主之氣蓬春則聞報不驗又不令警團追躡駐防軍隊  
以令既如此遇有匪警亦率置不理惟來要給養駐責供應去  
索開拔費甚者藉端擾民民間匪盜非所問也民以縣署不能  
負責保護無人更加憂鬱因二

搶劫案件既多始猶派警隔三五日分頭下鄉勘驗一次繼而  
蓬春以爲煩且以詳報或担考成不詳報又有匿盜之律因令  
幹警轉告事主謂報案則贖人時多費錢項且不易託人管  
一面通知匪徒使掠罷臨行時必揚言曰報案要一千不報案

## 成安縣志

卷十五 故事

四十

天津文竹齋印

要八百從此民遭搶掠不復到縣署呈報遂將數千年仰仗縣  
署之心轉而之他蓬春方幸無事且喜得一意聚斂邀上峯歡  
而不知縣署之責任既推脫縣署之權限亦因而減消民遂不  
知縣署爲何物因三

十四年馮李之戰直督李犧牲南四府撤兵回津直軍去而豫  
軍來豫軍敗而奉軍又至來往錯拆如鋸切木地方愈益不支  
愈形糜爛蓬春不顧民艱悍然立奴隸性質之支應局委派專  
員主管其事冀飽各軍之欲壑固其榮寵今日捉車騾明日籌  
糧秣今日徵夫役明日派門兵一切牀鋪麩草酒食宴會之資  
尚不在內民知斂錢納欸並不知所納者係何欸目警團絡繹

於途到鄉勒索例費之餘皆催促曰交款交款而已於是民但知縣署爲要錢機關除要錢外百事不管也土匪亦變本加厲易其掠老幼者掠男丁並易其掠男丁者掠婦女焉民萬出無奈遂有自謀自顧之心因四

十五年夏秋之交遼人宋家駒奉褚玉璞之委到縣任事適南北兩軍正在縣境對峙之時民房爲兵住道路橋梁爲兵守商家停止營業農戶停止營生鄉村彼此不能往來民不堪命而家駒於陰十月至十二月徵本年糧銀帶地方款共九萬餘元預徵十六年糧銀八萬餘元按畝派購善後公債七萬餘元按畝派購八釐公債七萬餘元區區成邑兩月之間徵款三十餘

## 成安縣志

卷十五 故事

四十一

天津文竹齋印

萬而派車派役及支應局支用各款尙未計及催役則盡法警及行政警察之數尙不足用加派保衛隊二百餘人分路勒催村長副因款被押在所者差房爲滿常十倍其息稱貸交款鄉間催款則左執斗右執秤挨戶搜查有粟過斗有棉過秤賤價出售足其應攤之額而止若棉粟全無者送縣責押不容分辯以故民有質莊典地者有鬻妻賣子者有自盡以尋非命者而家駒則記功受獎爲一省最民恨之人骨因五

遠近有此五因民已有鬱鬱欲發之意次年正月適紅槍會自

山東傳入會首劉希賢

後死於大名

以抗款剿匪號召一切其說遂深

中民隱至燒佛說咒鎗炮不入民不信也正喧傳間縣署令支

應局言奉冀南鎮守使電要大車七十輛計應派車價三萬餘元其速分配以便標差勿誤不數日差到村民欲照交無力措辦不交又懼責押狡黠者遂入會以圖支吾家駒廉得其耗托故赴津不復回縣直至二月底始以孔昭芹暫來代理而三月十九日之禍作矣

自家駒去歛擱不催鄉民以會力抗之也入會者日益多有所謂天門會者有所謂黃沙會者有所謂白纓藍纓黑纓會及拖力會者會名不一而抗縣款剿土匪奪還男女肉票則萬夫一志是以初則滑民導於前既一般良善亦相挾而隨於後傳單一散遐邇響應雲集景從其鋒遂不可遏而止

## 成安縣志

卷十五 故事

四十二

天津文竹齋印

陰三月三日縣南境郭三村保衛分隊首被會民繳械因會隊同爲縣民本無深讎不可遽爲敵視且聞入會者刀槍不過先爲奪氣不敢盡力抵敵之故縣總隊得警報後知時局有變卽分電各分隊拔防來城時有縣東北境大堤西北渚兩分隊來稍遲大隊長林長勝率隊接應至店上鎮即霧都寺被會衆包圍死於戰線斯時縣城四門不開戒嚴緊急會民愈益橫厲不可當勢將圍城紳民調停再四終歸無效至十九日城門不守會民乘勝首入西門東南二門亦次第入惟進城後規格頗嚴以家駒去孔新來無德無怨置不驚恐除警團兩部聞風星散民衆乘機取其殘剩槍枝對於一二當事紳家稍有毀損外餘均安

堵如故

且進城後城中治安無人保護衆推黃沙紅槍天門三會組織三大隊暫負維持地面之責民心始稍稍安定自此數月城鄉百姓無所依歸又權立總團部於城內民間口角錢債鬥毆殺傷等案均赴總團請爲剖斷而縣署不聞不問等若枯殼蓋鹿已早失急遽間不能復也十七年晉軍到縣商總司令爲河北

主席邑人張永和上牧羊歌諷以示意其詞曰

我有一羣羊寄與臧與穀臧穀驅羊去嬉游恣

所慾飲不尋清泉食不擇平麓已及孵字時並不使孕育大杖搥其首大石投其足剥皮割膏脂背主食其肉臧穀飽且醉駟南山宿一宿十六年迄今仍坦腹狼以羊無主喻羊入溝瀆虎以羊無主噬羊滅其族猿以羊無主倒羊懸高木風霜與寒暑十已傷五六羊苦無可依吞聲向天哭臧穀驚未醒強啓朦朧目錯認羊不良猶復加捶撲阿羊懼俱死崩羣四馳逐肆口嚙禾麻梃身踐花竹爾牧磨肱至豎角競相觸主人怒羊蠹磨刀將盡戮戮盡慮無羊不戮羊滋毒盤桓復盤桓進退實維谷今羊欲歸主不知戮與畜我亦牧羊人爲羊歌一曲阿主誠愛羊當選賢明牧

## 成安縣志

卷十五 故事

四十三

天津文竹齋印

使羊得所天百邪自屈伏  
愛羊若愛歌此歌宜三復

主席採納飭縣辦保衛團融納各會民於各村團內使爲村團團丁惟其時村制未備縣署屢辦不能妥協至張縣長子仁到任實行團制始解散各合會納之軌物而會民中之稍明事理者亦知前行之過激遂安然帖服仍爲良善迄今除少數別有圖謀者外全縣各村已無所謂會之名色矣

按會民入城時風聞有土匪數十人乘隙混進窺看守所無人看管遂將鎖押要犯中其夥匪十數人盡數釋放會民不及察覺竟令逃逸亦倉卒起事中疏忽之一端也未知確否按紅槍會起自山東天門會出河南臨縣黃沙白纓藍纓黑

纓拖刀等會皆不知適從何來紅槍會源遠傳聞未確茲錄  
天門會之起源以例一般十七年夏臨漳馬師長瑞雲有父  
喪<sup>和</sup>往弔焉席間有林縣李北海先生談及所謂天門會者  
李屢細述之曰有韓玉明者河南林縣油村溝人素業農耕  
田不力常作粗笨木工以佐食民國九年秋收無望木工亦  
不能糊口思到山西賣藥求生以無盤川便賣家中舊存銅  
鐵檢出其祖遺銅印一塊上篆靈寶法司之印六字已廢蝕  
不堪韓以爲我既不識醫道所備藥丸亦屬平常恐亦難招  
買主此靈寶二字必係神我以神印印成發票即可稱爲神  
藥神藥治病多而招來廣必能得利因背藥攜印卽赴山西

## 成安縣志

卷十五 故事

四十四

天津文竹齋印

沁縣一帶售賣初售出頗多寄家信及與其表兄老石匠寄  
信極言生意好頗多誇耀之詞久之藥不治病遂困憊至十  
二年春潦倒回家仍復爲農而老石匠是時又貧無衣食少  
生活路乃借韓銅印亦欲赴山西賣藥韓不允老石匠背韓  
取之而去韓無奈令其另赴兩縣或可售出切莫再由舊路  
以免假藥遭困老石匠依計而去至十五年春又困憊歸是  
年九月底油村溝修土地廟老石匠來村做石工夜宿韓家  
因與韓議曰現在土匪日盛人民生命財產無所依託而官  
署苛稅雜捐又日重一日百姓無復生趣聞河南靈寶縣有  
紅槍會能打土匪能抗縣欸咱之神印亦有靈寶二字何不

成立一會收取會費以斂財不較勝從前賣藥時乎韓以爲恐人不信老石匠又寫謀因將銅印就夜深埋至打石山麓之石縫中明日率村中少年到此攻擊偶得銅印衆方驚韓遽前拾視而言曰怪不得夜夢玉皇老爺賜吾銅印命立天門大會救此一方人今果然矣老石匠又從而左右之因得其黨十一二人然村中近鄰皆知爲賣藥時印不之信遠村又以其人無名難靠不肯入因之韓在各村喧傳多日無入會者而林縣知事公署聞其抵抗雜捐恐與搜欸不利立命警佐謂油村溝起天門會應多派幹警將該村從速剿滅警佐同所傳與巡官抽調各分所幹警以便出發而此信遂周

## 成安縣志

卷十五 故事

四十五

天津文竹齋印

知全縣油村溝人自思曰我等並未入會何故剿我有逃者有不逃者有逃至別村而復返者三四日後而巡警百餘人始入村兜剿惟巡警到村不拿韓等十餘人專尋稍有資產者肆其威虐有不如意卽執之入縣村人共計以爲無復生理因聚衆持械抗拒巡警至此欲打槍而壞不能用者實居大半其餘有打不響者有打響而不知瞄准者移時不能支而潰退乃回城妄稟謂天門會人眞槍炮不過以掩其罪知事聞之遂亦膽懾以後催欸遂不敢復至油村溝惟油村溝人擊退巡警自以爲必遭大禍人人危懼韓等又悚以利害勸之入會以自保於是油村溝全村始入會後月餘鄰近各

村皆以油村溝拒警卽能頂款始與涉縣鄰村漸次入會適磁縣奉軍馬隊第六旅強住民房激變民衆而該會始東而至磁臨成亦相次波及後以會民剿匪之故匪圖自保臨漳土匪入會尤夥天門會之起源大致如此至紅槍會會首劉希賢相傳係庚子亂時劉勝先之族叔噫吾成與伊叔姪有何讎恨何先後必來吾成肆亂致吾民受害如此之酷也按各會之起其初皆一二狡猾者爲之倡中間有願入以求自保者有相迫而不得不入不敢不入者此項人占會衆大多數

數

總額約十分之八九

最後因各會匯剿土匪之結果匪徒有改良入會

## 成安縣志

卷十五 故事

四十六

天津文竹齋印

矣有治權者辨之宜早辨也

民國二十年九月六日夜十二鐘有土匪百餘闖進西區溫家莊肆行焚掠修武團及西區第一隊率領各村團民入村捕擊因匪徒衆多又在夜間擊斃賊匪不知多少團民陣亡史景綱溫庭劉振唐郭慎清四名受傷七名村婦被匪擊斃一名村中男女被擄去共三十五名亦金山劫

見人物門

後最大之慘劇也

